



Sarajevo, 28. novembar 2019. godine

- SAOPŠTENJE ZA MEDIJE -

PARODIJA I LICEMJERSTVO

- SVI APSURDI VANJSKE I UNUTRAŠNJE POLITIKE BiH-

Zašto haotična dnevna politika, skriva apsurdne obje naše politike - i vanjske i unutrašnje!?! U svijetu, sve je manje granica između ovih politika, no u BiH je to eklatantan primjer gorućeg metodološkog pristupa i akademskog vrućeg krompira. Proteklih dana, mnogo je propusta, poput:

1.) Postizanja dogovora između političkih aktera o formiranju Vijeća ministara BiH i usvajanja dokumenta 'Pregled reformi BiH'. Naime, predstavnici određenih političkih partija iz RS-a, među kojima prednjače članovi SDS-a i PDP-a, utrkuju se ko će snažnije kritikovati SNSD radi, kako navode, 'kapitulacije' ili izdaje srpskih nacionalnih interesa. Zvaničnici NATO zemalja prolongirali su uslov knjiženja vojnih lokacija i omogućili aktivaciju MAP-a za BiH upravo radi obećanja koja su im data od strane nosilaca funkcija u državnoj vlasti koji su bili iz ove dvije političke partije. O tome svjedoče i usvojeni strateški dokumenti (Strategija vanjske politike BiH 2018-2023), ali i izjave tih istih političara (Dragana Mektića, Igora Crnadka i ostalih, što nije teško provjeriti analizom njihovih medijskih istupa). Za one bolje upućene, mogu se prisjetiti reakcije bivše njemačke ambasadorice u BiH prilikom sastanka sa ministrom Crnadkom. Stoga, satanisanje onih koji su se odvažili da preuzmu odgovornost za ono što nisu sami imali hrabrosti da sprovedu uprkos obećanjima, u najmanju ruku je LICEMJERNO.

2.) Saopštenja koja su se pojavila jučer (27.11.) na zvaničnoj stranici Predsjedništva BiH. Svaki član Predsjedništva pojedinačno je uputio telegram saučešća predsjedniku Albanije gosp. Iliji Meti, povodom stradanja nama dragih građana Albanije u nedavnom zemljotresu. Bilo da se radi o paralelizmu u provođenju vanjske politike ili potrebi za samopromocijom, na ovaj način je APSURDNO jer urušava imidž BiH.

I treći jučerašnji događaj koji su prvo prenijeli pojedini mediji, a nakon toga je i slična informacija postavljena na web stranici Predsjedništva BiH, odnosi se na posjetu predsjedavajućeg Predsjedništva BiH gosp. Komšića Ministarstvu odbrane SAD-a u Pentagonu. Navodi se da je dočekan uz vojne počasti kako i dolikuje jednom predsjedniku, ali je njegov domaćih bio dr. James Anderson, zamjenik podsekretara odbrane za politiku.

Naravno da se radi o najznačajnijoj svjetskoj sili, ali dignitet institucije predsjednika jedne države se ipak ne smije narušavati sastancima sa osobama, koje uz svo uvažavanje, nisu u potrebnom diplomatskom ili političkom rangu. Radi li se o neadekvatno pripremljenoj posjeti ili nedostatku iskustva u diplomatskoj praksi, ozbiljno je pitanje ili za samog predsjedavajućeg Predsjedništva ili za njegov protokol i savjetnički tim. U najmanju ruku PORAZNO.

S poštovanjem,


Dr. sci. Denis Hadzovic
direktor

